

重修岐山縣志

(全)

中國方志叢書·華北地方·第五三一號

據

民國·田惟均重修，白岫雲等編次
民國二十一年鉛印本

影印

陝西 省

重修岐山縣志

(全)

成文出版社有限公司印行

岐

山

縣

志

寶

璽



巨參支日系志

一 西安西山書局代印

乙亥八月

重印

重修岐山縣志序

邑之有志猶國之有史也顧其義有廣狹之分而紀事實屬褒貶則一也岐山縣志自清光緒十年胡任昇猷重修後迄於今歷時逾五十載中經清末變法民國肇建舉凡志垂所載鮮符社會現狀不有以重修之勢必年遠代溷考徵莫由甚非所以重掌故而示將來也癸酉春余奉令長斯邑時當饑饉連年萑苻遍野滿目創痍寸心若結有志未果者久之客歲多黍多稌民困漸蘇爰集紳耆協議禮聘邑名宿薛君悅如白君慕陶龐君子鳳主稿設館編纂並呈大府備案八閱月而全書告成諸君子不憚寒暑旁採博諮存其實畧其疑刪其繁補其闕舉數十年來政教之因革損益地方之天災事變人民利害分門別類纖悉靡遺儼然一邑信史也余於披覽之餘不禁有感焉岐陽爲有周發祥地文王發政施仁先及無告周公制禮作樂甞井分田蔚爲一代邳治之隆余何人斯承乏茲土瞻仰前徽汗顏無地方今國難當頭洪流汎濫毀紆遏抑匹夫有責所願有識士民遠師成規近採歐化調劑盈虛崇

本抑末父詔其子兄勉其弟不數年間將見家給人足社會昌明古人稱立德立言立功爲三不朽邦人君子其亦共相策勵而有以挽回劫運共濟時艱庶不負諸君子苦心編輯之微意也夫中華民國二十四年八月上浣與平田惟均謹識

重修岐山縣志序

吾國史志之學原於尚書春秋尚書禹貢一篇言山之位置水之源流五金之出產田賦之上下貢品如玉石幣帛鳥羽獸皮等類各州所產特色之物無不備詳後世志書實以此爲藍本周以封建立國欲知各國之政治得失風俗人情故立稗官取街談巷說歌謠之詞摛之成詩太師陳之以供國史之採擇十五國之風詩即十五國之志詩亡而孔子作春秋以寓褒貶蓋又史之進化者也當時周有國史而魯又有春秋晉有乘楚有檮杌各國皆有史亦猶後世省有省志縣有縣志耳縣志志一縣之疆域山水田賦戶口人才物產風俗古蹟及草木鳥獸之屬爲省志之材料而省志又國史之材料也司馬光作通鑑採雜史至三百二十二種之多宋史藝文志載小說類一千八百六十六卷可見志宜詳而不宜畧國史取材於省縣縣志又宜加詳也何也分爲縣志總爲國志縣志所載者不必盡採入國志不可令作國志者嗤縣志之太簡單也吾岐縣志自前清光緒十年知縣胡昇猷重修至今五十年來

未舉其事續修之說亦聒於耳者數年矣前任陳縣長滋福樊縣長明初毅然提倡卒以歲歉中止茲田縣長子平極力籌畫進行延余與白龐兩君同力合作以期必成不得不勉從其事取採訪各條以類纂敘將舊志之畧者詳之缺者補之誤者正之光緒十年以後之事例可載者又調查確實亥亥無訛雖僻地遐邇人無芻蕘之遇事無口碑之傳不免間有遺漏而凡得入奚囊者無不備載矣庶幾岐邑忠孝節義之大綱仁慈禮讓之雅俗以及人民利害安危之實在社會文化消長之狀況已過者不至湮沒而弗彰後來續修志書者亦有所考究比例焉時在民國二十三年八月上浣邑人薛成兌謹識

岐山縣舊志序

明國西道 姚九功 山西進士

志即古列國之史所以志當志者也事有損益言有美刺故孔子修春秋有知我罪我之言其說禮也又謂杞宋不足徵文獻不足故也我皇明一統定志綱列目張制甚詳也藩司郡邑亦各有志稽諸古也關係匪細修廢有期未易舉也茲惟岐山迺周家肇基之地文武周召數聖人者出於其間河山環帶麟鳳呈祥固秦中之雄也舊志有無代遠年湮靡所稽考守土者因緣衝疲日惟僕僕亦無復文事之思以飾治嘉靖己未歲知縣韓子廷芳山西洪洞人忠定公之後也素愛讀書蒞政期年治跡可觀嘗謂縣志爲昭鑒之規勸懲之機也典弗可缺欲惇厥典會鄉士夫以茲典請遂請諸當路咸若允俞延邑人高唐州知州舉人徐子衡爲之編摩霍山縣知縣舉人楊子楠自在州知州舉人武子揚爲之校讐拔庠生之尤者二三人蒐羅故實乃自總統厥任規矩事例視他志加詳法一統志少畧焉首地理以重分野次建置以究王制次貢賦以稽則壤形勝山川人物土產各以次序事求核實文尙明信微

顯絕讀彰善瘴惡於史法亦有得焉刻成鄉士夫請序於予予重其典遂序而弁諸簡端

舊志序

明知縣 于邦棟 山西舉人

志史類也邑有志猶國有史蓋一方星輿田賦君師治教習尙人文胥此攸繫若古禹貢職方周官小史諸籍是已是以先王重之岐故有志成於先令韓子廷芳氏垂今歷數十年余承乏來岐取而觀之見夫義例有弗明鴻織有未悉以及近年來有宜續者亟欲修之顧邑當衝疲百務叢委牒訟徵科日復擾擾未逮也乘有餘暇蒐閱圖冊撻拾墳藝咨以百衆訂以見聞據實則直書因蕪則削去宣亡彰隱辨疑正訛事核其舊而義擇夫新文刪其華而例比諸當附以管蠡倍加增損凡一越歲三易稿而甫就緒第卷爲六別類有八曰輿地曰風土曰建置曰賦役曰祠祀曰職官曰人物曰藝文合而觀之則一邑之事概可備見自今伊始邑有著乘其文獻不足徵乎惟徵則信惟信則傳豈惟邑人士之賴而余嗣修之初心庶亦少釋矣異日觀

風使倘有採焉將謂之岐之史可也志云乎哉嗚呼斯志惟史斯新惟故媿余非才
雖未致厥精懿然亦頗脫舛謬知我罪我奚辭也繼余令茲者或復有更定焉則茲
舉未必無小補云時大明萬歷十有八年歲次庚寅春三月上浣之吉

舊志序

清知縣王穀江甯貢生

昔太史公作史爰建八書而班固遂廣之爲志後季相沿奉爲職方之紀凡輿土經
制風俗人文靡不畢載是邑之乘即國之史也岐舊有志始於洪洞韓子修於古唐
于子頗稱詳核自鼎革後梨棗散失文獻無徵當事者每核故實輒臆度以對嗟乎
姬周賢聖歷代相承而令其發祥之地湮沒不傳毋論山川失秀即掌故弗稽亦長
吏之羞也予不敏承乏茲土甫下車見西岐古治盡委瓦礫荆棘名勝風華消沉殆
盡間或觀風懷古一二耆碩談之娓娓如觀螺指上輒欲記之以備邑乘適秦川多
事軍興旁午催科日拙苦無刻暇而督學秦公郡大夫王公留心典故屢檄其成予
不揣譎劣乃爲審度事勢斟酌時宜善者因之弊者革之廢者舉之變者通之本於

舊而採於新其繁而更其陋闡微發隱晰疑正訛遠以表周原之盛近以明昭代之興人物風土一覽備悉雖不敢上同韓于二子或亦藉是以有徵矣所可斷者市廛冷落民社蕭條流移何自而招徠文學如何而蔚起是不得不望後之君子嗣是而增華云時在順治十有四年歲次強圉作噩涂月上浣之吉

舊志序

教諭

王業隆

平涼貢生

嘗覽岐山舊志嘉靖時韓侯爲之越萬歷十有九年于侯爲之讀二志者或謂後不如前或謂一邑之紀載不詳無以備後世人之考核無以資廣輿記之採葺然而于志則詳矣是皆置勿言大抵世閱世而日新事踵事而彌出有前之所存或爲今之所已廢者今之所有或爲前之所未載者繼起而作烏容不望諸後之君子岐山邑侯王公廣陵人瑞也下車來政治有關於國計民生者靡不焦勞而舉舉焉以志者經史之羽翼也思岐志自兵燹以來無論舊板灰飛其擱筆於獲麟後者距今將七十載若形勝若山川若物產今猶昔矣其他風俗建置賦役祠祀官職人物之類有

變移不一姓名未登人品互殊者網羅舊聞審觀謠俗一一皆增集之兼以星斗之胸雲錦之筆形勝山川聿受物色且優貶不泥于舊案詳畧恰當夫新裁尤見博通往古有若親目泊諸卷之中每項各有標題讀之令人曉然于事之所繇來勃發乎性之所本具則是書也其於學與仕也裨益良多矣豈徒以文章昭茲來許哉因命梓人傳之永久僅以數言揚其盛云時順治丁酉歲建子之月

舊志序

陝西巡撫畢

沅狀元

志者史之一體也劉知幾云史莫難于志而志地理尤難蓋夫山峙川流申畫之定界也高城深池建置之大端也任土則壤貢賦之成規也然而代有沿革時有治忽由是政事有損益官師有賢否民俗有淳漓土物有贏絀苟非證今憲古勒有成書俾此中利弊因革貫串於中曷由見諸施行而各得其職矧岐山爲周室開基之地關中數千餘年聲名文物胥於此肇端倘因陋就簡任其文獻無徵莫之或顧得非守土者之責歟余奉天子恩命簡任封圻巡撫茲土七稔於茲其間望山名水以及

故墟廢井大半經行而於岐山尤不憚致意再三每馬跡車塵經過其下必恭詣
周公祠廟容與瞻拜覺當日辟雍鐘鼓流風餘韻猶有存焉因憶其間必有閎通淹
雅之才隸事摛文暢演鴻製以道揚其休美願余廣爲諮訪惟國朝順治初年縣令
王穀所輯一志僅有存者而義例未盡允諸因諭平令世增留心甄輯而胡農部文
銓爲編刻焉繼而平令以銅務赴滇未歲厥事爰諭三水郭令履恆來攝邑篆履恆
爲南一先生令子南一所學淵源伊洛爲河汾人士宗師郭令能世其家學甫蒞岐
下卽修文廟以崇聖教創書院以育賢才余心儀之謂其能以文學被飾吏治有
古循吏風未幾復以平令未成志事爲請許之不一載以書成來上公餘之暇間肆
披覽爲門有八卷亦如之其中發凡起例參稽案牘斟酌民言舉凡山川田賦建置
官師民風土物訂其舊而補其新其用心可謂勤且苦矣於是歎斯志之得其人而
令之勇於從事尤不可及也嗟乎天下之事其初常苦於有所待而其後往往因循
展轉遂至於不復爲今令於志事尙如此則其於民生利濟政事綱紀所在苟有可

爲又其肯綮哉樂觀厥成因爲叔其端委且並以勵其後效也時在乾隆己亥冬十月下澣

舊志序

知縣 郭履恆 山西 舉人

從來事之興廢存乎人而人之舉事時平時有舉事之志而時有未及爲非其人之責也若時已可爲而謂非先務之急因循苟且任其廢墜而莫之顧則咎有攸歸矣履恆自媿才識卑陋夙秉庭訓凡事於所當爲者未敢少有委謝然往往爲時所阻而不獲爲憶自乾隆壬辰歲恭奉恩命簡發陝西蒙大中丞畢公奏補邠州三水令洊任伊始即有意邑中文獻而以地瘠民貧當務之事隨廢者多其被飾文具固有志而未遑也歲戊戌岐山令平君世增以銅務赴滇中丞以恆承乏其間岐山故周室開基之地當日菁莪棫樸壽考作人迄今數千年猶覺聲名文物雲漢爲昭士人一行作吏幸洊斯土安可以法令文具自外於豐鎬之遺爰於下車之初首捐廉俸飭修文廟以崇聖教復於邑中建鳳鳴書院進鄉之俊秀而教之以副德造之選

時復以中丞公丙申入覲有重修府志之奏平君曾以岐邑志來自國朝順治初年以後久未興修甄錄厥事延胡農部文銓爲之編訂未幾繳委辦理清銅其事中輟余惜平君有舉事之志而時有未及爲爰復請於中丞舉胡農部所屬原稿若干卷爲之叅案牘酌民言以蔣君兆甲擅著述才時爲邑學官囑其重加編校余復於鞅掌之暇詳加研究不一載汗青始竟非敢謂其盡善也所可幸者余夙有舉事之志而令三水則有所不及爲平君及爲之矣而以公務中止必待余而爲之非適際其時而能如是乎故樂爲書之庶以慶余之遭也至於今之岐猶古之岐也山川不改民物依然顧何以使其戶慶盈寧家敦禮讓俾成周之盛復見於今是所望於繼官茲土者而恆雖不才亦不敢不勉也時乾隆己亥冬十月上泮

舊志序

教諭 蔣兆甲 渭南舉人

乾隆戊戌秋八月余司鐸來岐邑侯郭明府崇峯先生以三水令攝岐篆方數月也庶政惟和士民雍睦乃以岐之舊志示余而言曰此前令鑑湖平君世增與農部主

政燕山胡君文銓所甄輯而未竟厥功者方今廟學重新書院創建及北門之復啓業有規畫矣惟茲邑乘余亦當集其成以戴平君之事子曷爲我編焉余惟身陋自慚力辭厥任而明府力請於中丞又以邑孝廉蔡君毓章明經吳君江助余參訂不得已乃取舊志觀焉旣而嘆曰甚哉志法之難也今之郡邑志古之國史也昔王阮亭序新城志云以余所聞前明郡邑志不啻充棟而文簡事覈訓詞爾雅無如康對山武功志胡可泉甘肅志序云康太史武功志猶存史體可仿也余讀武功志自從學於武功孫酉峯先生願知其善而弗知其可仿也及觀先生之志郟陽志鄆則有神明於對山之志法者然後知對山之能存史體而先生之善法對山今岐之舊志余仍取酉峯先生之志法而少變之聯以八篇分以四卷訛者辨之俚者刪之義例著於篇端次第括於目序願亦不知其繁而理簡而能明也而惟以所輯者就正於明府而始存之其於舊志不爲無加毫末已抑余聞之岐有邑志始前明嘉靖時邑令韓君廷芳願其書不可復見今所見者于君邦棟續於萬歷時王君穀再續於國